



129
27

QUÆSTIO MEDICA,
QUODLIBETARIIS DISPUTATIONIBUS
MANE DISCUTIENDA
IN SCHOLIS MEDICORUM.

Die Jovis decimâ-quintâ Decembris 1707.

M. JOANNE HERMENT,
DOCTORE,
MEDICO REGIS ORDINARIO,
ET SCHOLARUM PROFESSORE,
PRÆSIDE.

An incunte morbo vomentibus vomitoria?

I.

VOMITUS ineuntis morbi comes aut præludium, morati sanguinis, non cumulati humoris indicium, gementis, non operantis naturæ argumentum. Erethismi genus est, quem invehit, non humorum copia, sed liquorum mora, sanguis hærens, non humor exundans; secretionis vitium est, cujus author non infrequens spasmodica fecernentis organi angustia, fecernendorum anomalia. Igitur, quod in alvo cassum egerendi conamen, in vesicâ milituratio, inpectoris tussis, simile quid videtur assidua vomendi cupitas. Ventriculi tenesmus est; hanc enim publicam fieri atque generalem vocem, quid verat, quæ siccæ quasvis, aut irritas egestiones designabit? Ut ut sit, rem intelliges, si memineris criminis alieni pœnas non infrequenter à ventriculo lui. Concussu cerebrum, phthisi pulmones, jecur inflammatione, obstructione lien, nephritide renes laborant? Vomitat ventriculus. Vesica dolet aut inflammatur? con-

vellitur aut tumet uterus? convoluuntur intestina? Vomitus succedit. In causa est stomachi fors aut conditio. Commune viscus est, pars publica, quæ ut sibi minus servit, quàm cæteris; sic omnium damna sentit & pœnas. Resonabilis est universi corporis Echo, respondens omnibus, omnium concussionibus nervorum, omnibus spirituum undulationibus & oscillationibus resulans. Post hac, vomitum vomitui addes? vomentes vomere jubebis? Currenti equo calcaria addere est; præcipitiq; malo stimulos. Posita enim malè est vomitionum causa, quæ aliunde, quàm è ventriculo venit, sedibusque remotis debetur. Nascentibus potissimum morbis turbata suspensa ve liquorum cum solidis commercia, motus non dant, sed tumultus; tam insidiosos quàm multiplices, quò plures enim simul impetuntur partes, quibus præcipuè medela paretur. Hinc inconspicuum, magis, cui primum succurratur.

I I.

MALORUM cumulum addes, si morbum pepererit sanguinis flamma. Quid autem, si hæc ipsa sit gravissimorum morborum fomes, pessimorum symptomatum ipsarumque vomitionum causa? nùm hîc quoque vomitoriis locum dabis? sed fortè, an in suspicionem tibi venient cæca morbi malignitas, humores numquam coctibiles, turgentes succi, serum oberrans? Phalerata dicta; quasi isthæc vomitoriis curari amarent. Malignitas frequens minùs, quàm decantata, medici dexteritatem ut plurimum postulat magis quàm dexteram; manum minùs quàm animum. Turgentes, tumultuantes, & intractabiles succi vomitioni tam inepti sunt quàm coëctioni. Sed aiunt subesse humorum saburram intrâ primas vias coërcitam; porrò tali, ut communi & publicæ morborum causæ vomitorio opus erit; Esto; si reverà subsit, si febrem faciat si Achillæo egeat præsidio; verùm ad manum sunt, quæ humores, qui sic in viâ sunt & in proclivi, facile pellant.

I I I.

QUID ergo consilii? quid remedii? ne vomitionum tormentis miserè succumbat æger? intelliges, intellectus solidorum symmetriâ, liquorum cursu, sensu nervorum, spirituum motu. Infirmo talo singula hæc sulta putas? confirmant principum artis consilia, observatio, usus. Medicinæ patribus compertum fuit, diluentibus, anodynis, mulcentibus, venæ sectione, compefci vomitiones; sed iis omnibus concordant partium corporis mechanicæ leges. Hominem concipitò bene sanum & incolumem, hunc inopina corripit febris, peripneumonia, pleuritis, vomitionibus stipata. Harum cau-

fas quæris & auxilia ? in promptu sunt. Sanguinis excursus & undas (quæ pulsu æquali, placido, regulari, ad habitum corporis & viscera modò ferebantur) illicò intercipi putes alicubi & interturbari ; liquidorum & sanguinis vortices misceri, necesse est concipias ; sanguis enim objecta sibi sentiens repagula in se revertitur, turbatur, coërceturque corporis centro : stagnatione suâ & mole viscera premit, morâ, lentore, fatigat, vitio & acore laceffit. His omnibus suâ vasorum & nervorum multitudine maximè patens ventriculus singulorum sentit incommoda, vellicatus insurgit, tandem expedire se vomitando nititur. Sanguinis tumultum missò sanguine compescis, diluentibus diluis, mulcentibus sedas, verbo, liquidis suum ordinem reddis & seriem, suam solidis agilitatem & mollitiam, restitutoque sanguinis circulo, vomitio cum febre evanescit. Hanc ergò tibi dicas legem, sinceras à veteribus inventas fuisse morborum indicationes ; à recentioribus veras indicationum causas, tutas in tantum & laudabiles, in quantum post inventam medicinam feliciter quæsitæ sunt & felicius inventæ.

I V.

PER PLURA sunt, si alios audias, quæ hîc vomitoria commendent ; observata nempe plusquàm vulgaria, multi nec infelices vomitoriorum eventus, multiplicia curationum miracula, medendentium exempla. Hic acutissimo lateris dolore laborans, quem gravabat in primis cum tussi & sanguinis sputo, assidua vomendi cupiditas, emetico præproperè oblato, velut incantamento convaleuit. Nauseabat alter sub primis peripneumonix initiis, sanguinemque plenis fundebat buccis ; talem exinaniri sanguine jussissent vulgares Medici, quem ab orci faucibus vomitorium eripuit. Tertium ex febre malignâ vomitantem missis cardiacis vulgarium remediorum ludibriis, emetici iterata dosis illicò sanavit. Narrantem deficeret tempus de nephriticis colicis & dysentericis vomitionibus, quas compescuit ex arte instituta vomitio. Aliud cogitabis remedii genus præsens aut catholicum magis ? aliud invenies, quod missis fastidiosæ methodi ambagibus, citius, & jucundius curet ? profectò hoc in uno totam artis industriæ summam locare, ægrorum solatio vacare est, artisque compendio studere.

V.

IT A sanè, sicut quæ de suis arcanis effutiunt & pollicentur medicastri, æqualia non essent aut majora portenta. Sed illius erroris fons est, usus aut experientiæ præpostera intellectio. Arti fidem dat ille usus, qui universalis, qui consonus rationi, qui naturæ respondens, qui

indubitatus est, qui confessus; demit, qui singularis est, nuperus, anceps, futuri ambiguus, controversus. Porro illas certitudinis notas, hæc insignia, sola meretur & affert antiquitas, veritatis index. Absit tamen credideris, id unicé tibi adoptandum quod antiquum est aut à veteribus traductum. Veterum ergò inventis addas, conceditur, sed quæ ejusmodi sint, ut, dum nostra implent vota, nepotum spondeant, cogantque suffragia. Sed hæccine est vomitoriorum conditio, quæ vomitionum aut nauseæ pretextu, medias inter partium inflammationes quotidie imperantur, ipsa inter sanguinis incendia? externa hæc inventiuncula est, priscis indigna temporibus, patribus intentata, nepotibus ejuranda. At tamen temerarii non est Medici interdum emetica tentare, non enim fucum faciet de vomitu vomitui addendo divini seminis effatum. Locum obtinet, ubi sanguis hæret sine febre, lentescit sine ardore, stagnat sine dolore. Ubi vomitiones facit, non bilis æstuans, sed serum exundans, non falsus, sed multus humor, non fictitia succorum malignitas, sed vera putredo. Ubi viscera gravantur, non punguntur, gemunt, non convelluntur. Iis conditionibus positis, vomitum vomitui addere sana res est; demptis, piaculum.

Non ergò ineunte morbo vomentibus vomitoria.

Domini Doctores disputaturi.

M. Petrus Tonnellier.

M. Carolus Thuillier.

M. Joannes Boudin, Serenissimi Principis Delphini Primarius Medicus.

M. Joannes Gaillard.

M. Carolus Bompart, Rei herbaria & universæ materia Medica Professor.

M. Gnydo - Erasmus Emmerex.

M. Matthæus-Dionysius Fournier.

M. Nicolaus Andry, Professor Regius.

M. Michaël de Hodencq.

Proponebat Parisiis MICHAEL PROCOPE COUTEAUX,
Parisiinus, Baccalaureus Medicus. A. R. S. H. 1707.